

四庫全書

子部

欽定四庫全書

子部
事物紀原卷五

詳校官中書臣李彤

侍讀臣孫球覆勘

總校官中書臣朱鈐

校對官助教臣蔡鎮

謄錄監生臣段文新

欽定四庫全書

事物紀原卷五

宋 高承 撰

三省綱轄部二十二

侍中

環濟要略曰古官也風后為黃帝侍中周有常伯見
尚書立政秦漢為侍中徐堅初學記曰秦取古官置
本丞相史也丞相使史五人來往殿中奏事故謂之
侍中後魏始為樞密之任梁文以為宰相職事唐侍

中與中書尚書二令並為真宰相矣

門下

門下侍郎秦官秦有黃門侍郎歷代不改與侍中俱
管門下衆事凡禁門黃闥故號黃門其官給事于黃
闥內故云唐天寶元年改曰門下唐百官志云二年
也

散騎

秦置散騎又置中常侍本二官魏文帝黃初初合散

騎常侍為一官唐顯慶中分左右左隸門下右中書也

給事

秦置通典曰加官也初秦漢別有給事黃門之職後漢有給事黃門侍郎左右給事中有有事殿中故曰給事中獻帝時去給事黃門侍郎後周有給事中士別置給事中有在六官外隋初開皇六年始于吏部置給事郎煬帝移為門下職唐武德三年改給事郎為

給事中

夕拜

漢給事中故事每日暮時入對青瑣門拜故謂之夕拜亦為夕郎

諫議

秦置諫大夫後漢光武增為諫議大夫歷代不改唐龍朔中屬中書開元後歸門下貞元四年五月分左右以右隸中書

二起居

周有左右史王言則左史書之動則右史書之蓋起居之本也漢武有禁中起居後漢馬后自撰明帝起居注則其事似在宮中古女史之職也此始有起居之名魏晉以降著作作掌之後魏有置起居令史別置修起居注隋煬帝置起居舍人唐貞觀二年于門下省置起居郎顯慶中復于中書置起居舍人以郎為左史以舍人為右史

諫正

唐武后垂拱中置拾遺補闕掌諷諫中宗以來有左右開元時左屬門下右中書會要云垂拱元年二月二十九日也宋朝會要曰雍熙五年二月詔改補闕為左右司諫拾遺為左右正言蓋太宗欲令諫官修其職業故改其官號也然周禮地官之屬有司諫則周已名官矣唐書朱滔傳建中三年滔僭稱王後二年聘張遂王道為司諫則滔又以此名立官也

中書令

舜納言周內史皆中書之任也漢武游宴後庭始宦者典事尚書謂之中書謁者置令不言謁者省文也通典云唐百官志則曰秦始置中書謁者漢元帝去謁者字漢魏品卑而任重隋文帝廢三公府寮令中書令與侍中知政事遂有為宰相職林以謂漢成帝建始四年改中書謁者令曰中謁者令以士人為之魏文帝黃初初改秘書令為中書令也

中書侍郎

漢武帝置中書領尚書事有令丞郎魏黃初初置通事郎後改曰中書侍郎唐志曰晉加侍字

中書舍人

初學記曰魏世中書始置通事一人明帝時有通事劉泰是也高貴鄉公改曰通事都尉尋為通事侍郎晉初置舍人通事各一人東晉各為一職梁始掌詔誥其後除通事直曰中書舍人舍人本周官掌平宮

中之政

尚書令

三代冢宰之職也秦漢置尚書令于百官無所不主
漢武元鼎二年始以張安世為之初學記曰秦官也
漢因之

僕射

秦官史記始皇本紀有僕射周青臣是也古者重武
以善射者掌事故曰僕射僕射者僕役于射也一云

僕主也古有主射以督課漢因秦事自侍中謁者博士郎軍屯永巷洎尚書皆有之成帝建始元年初置尚書五人一人為僕射此蓋其始也獻帝建安四年以邵榮為左僕射衛臻為右僕射置左右之始也

左右丞

秦置尚書丞一人漢成帝建始四年置四人光武始減其二分左右佐令僕之事唐以來在尚書之下宋朝官制改陞在上又為執政官

六尚書

尚書秦官秦時少府遣吏四人在殿中主發書故謂之尚書劉向新序曰齊宣王為太室香居諫王召尚書尚書之名則七國時已有其官矣晉志曰漢光武始分尚書為六曹通典曰漢初尚書雖有曹名不以為號及靈帝以梁鵠為選部尚書于是始見曹名漢百官表曰成帝建始四年始置尚書四人續事始云尚主也出納王命敷奏萬機政令所由宣選舉所由

定罪賞所由正李固曰尚書猶天之北斗斟酌元氣
運平四時

分行

唐會要曰武德令吏禮兵民刑工貞觀即吏禮民兵
刑工光宅元年九月五日改為六官準周禮通典曰
周禮天官冢宰掌邦六典以佐王理邦國漢成置四
尚書因事設員非擬于古光武分六曹稍以周禮唐
武后遂以吏部為天官戶部為地官禮部為春官兵

部為夏官刑部為秋官工部為冬官以承六官之制
國初以吏兵戶刑工禮為次神宗行官制復唐故事
又以吏戶禮兵刑工為次也

子司

又曰故事以兵吏及左右司為前行刑戶為中行工
禮為後行每行各管四司以本行為頭司餘為子司
自唐制始也

二十四司

自秦始置尚書而歷郎曹多寡不等或少或十二亦至三十六隋有天下尚書有六曹二十四郎即今都省列曹是也其制自隋始也

子司印

唐會要曰故事凡尚書省除吏部兵部外共用都司印至聖歷二年二月初備文昌臺二十四司印本司郎官主之

八座

後漢以六曹尚書并令僕為八座梁齊亦有稱隋唐至今令僕為宰相故六尚書及左右丞為八座蓋其事自漢東京始也

六侍郎

漢制尚書郎三歲稱侍郎隋煬帝即位于尚書六曹各置侍郎一人按漢百官表有侍郎秩比四百石也郎中

漢制尚書郎初上稱守郎中晉武帝始置諸曹郎中

唐以來號正郎武德三年尚書郎改為郎中按秦有郎中令臣瓚以為主郎內諸官則郎中秦官也

員外

隋開皇三年尚書二十四司各置員外郎一人以司其曹帳籍則郎置員外自隋文帝始也按漢書惠帝即位賜爵外郎滿六歲一級則隋置員外郎亦取漢事云爾韋述唐兩京記曰晉宋以來始置員外郎

左右司

隋煬帝即位尚書都司初置左右司郎一人副左右丞唐又置員外郎諸司號為都公唐書百官志云天后永昌元年置左右司員外郎各一人也

吏部

漢初曰常侍曹後漢為選部魏始曰吏部按周官司馬之屬有士司為下大夫通典則以為吏部之始疑出于此也

司封

左傳晉文公為執秩以正其官杜預云謂主爵秩之
官蓋今司封職也漢尚書有封爵之任後漢馮勤是
也北齊有主爵職林曰唐龍朔二年改為司封通典
以為光宅元年

司勲

周禮夏官司馬之屬有司勲掌賞地之法後周始置
其官于尚書省通典云後周吏部有司勲上士

考功

漢京房作考課之法而其職不在尚書光武改尚書三公曹主歲考課至此始為尚書職魏初置考功亦唐虞考績之事也而周禮亦有考功記云

戶部

周禮地官之掌也漢置尚書四人一主財帛委輸即今戶部任矣吳始有戶部名通典曰吳孫休即位戶部尚書讀奏是也周禮司民掌登萬民之數即戶部任也

度支

通典曰漢張蒼善筭以列侯主計領郡國上計者殆
今度支之任也魏文帝始置度支尚書唐以為子司
金部

周官職金掌錫石丹青之令則金部之職也魏世始
置尚書金部郎

倉部

周官倉人主藏九穀廩人主其數賙賜稍食則倉部

之職也魏時尚書始置倉部郎

禮部

唐虞秩宗周官宗伯皆今禮部之任也後周有禮部不言職事隋以典儀曹其名命自宇文周始也

祠部

魏代始于尚書置祠部曹蓋其官自魏始也歷代因之不改

主客

漢成帝初置尚書客曹光武分置南北客主于此遂以名曹

膳部

即周官膳夫也晉有左右士曹北齊曰膳部

兵部

周禮夏官司馬之職也魏有五兵尚書晉宋為七兵後周始曰兵部

職方

周官有職方氏掌天下九州之圖隋初有職方侍郎
通典曰後周依周官有職方也

駕部

周官輿司馬校人牧師巾車之職皆駕部之事也魏
晉之代尚書始置駕部郎

庫部

周官司甲掌戈盾弓矢則今庫部也魏尚書始有庫
部郎也

刑部

唐虞之士周禮司寇皆刑部之任也光武謂之賊曹為尚書職後周始有刑部大夫則刑部自宇文周始也

都官

漢司隸屬有都官從事掌中都官不法事此名官之初也光武改成帝二千石曹掌中都官水火盜賊魏青龍二年始置尚書都官郎佐督軍事

比部

魏尚書有比部曹通典曰北齊比部掌檢勾事唐天寶十一年改掌諸司公廨公私欠負及勾用度物也

司門

周禮有司門通典曰後周依周官有司門隋初為司門侍郎煬帝除侍字也

工部

唐虞共工在周禮為冬官之職漢置民曹光武改主

繕修工作池苑魏為左民晉尚書為起部郎後周始
曰工部也

屯田

漢昭帝始置屯田而成帝置尚書郎一人主戶口墾
田此蓋尚書屯田之始也魏代為農部晉始有屯田
尚書則屯田名曹在晉世也

虞部

舜命益作虞周禮有虞衡之官蓋虞部設官之本魏

始置虞曹郎後周改曰虞部

水部

周禮夏官有司險掌溝塗蓋水部之職也魏尚書始有水部郎

符憲儲闡部二十三

御史大夫

周禮春官宗伯之屬有御史掌贊書戰國時秦趙會澠池各命御史書鼓瑟擊缶之事淳于髡謂齊王曰

御史在前則上世皆為記事之官也秦漢以來始糾察風憲然則御史蓋周官也秦置御史大夫以為御史之率故曰大夫

中丞

漢初御史大夫有兩丞一曰御史丞一曰中丞初學記曰秦官漢因之謂之中丞以其別在殿中掌蘭臺秘書外督部刺史內領侍御史故云成哀間更名御史長史光武復曰中丞

獨坐

後漢宣秉傳曰光武建武元年秉拜御史中丞特詔與司隸校尉尚書令並專席而坐故京師號曰三獨坐今中丞亦循其制始自漢東京迄今為故事也

侍御

周為柱下史秦時張蒼為御史主柱下方書是也亦為侍御史是則侍御之官始于柱下也漢始有侍御史又有繡衣侍御史蓋自武帝置也後漢亦有之隋

直曰侍御史漢書朝議以范丹為侍御史是也韓朗以侍御史與三府掾治楚獄是也

端公

唐侍御史之職有四謂推彈公解事臺內之事悉主之號為臺端他人稱之曰端公其語自唐始也

南床

唐制御史故事食坐之南設橫榻謂之南床殿中監察不得坐也唯侍御坐焉凡侍御例不出累月而遷

南省者故號為南床今猶有是循唐故事也

殿中

魏蘭臺遣御史居殿中察非法即殿中侍御史之始也

監察

初秦以御史監理諸郡謂之監察御史蓋監察名官之始也隋文帝開皇三年始曰監察御史宋朝會要曰太平興國三年以張翼為監察御史先是三院多

外任風憲之職用他官領之遂詔正名舉職自此始也宋朝之制凡職事官皆他官領之惟三院御史自是始正其名也

裏行

唐太宗初置此官自馬周始也初馬周以布衣任事詔令于監察御史裏行遂以名官舊唐書志云貞觀初也龍朔元年八月以王本立為監察裏行唐會要以謂裏行之名始于此非也六典亦云始于馬周宋

朝行官制始省之續事始曰太宗時疑未以名官自
高宗始以命官云

三院

唐憲府故事侍御殿中監察呼三院故今亦斥殿中
曰殿院監察曰察院自唐室始也

六察

唐百官志曰監察御史分察尚書省六司興元元年
一人察吏禮部一人察兵工部一人察戶刑部歲終

議殿最元和中以新人不出使無以觀能否乃命專
察尚書省號六察唐會要云元和四年五月御史臺
奏舊監察御史從下第六人各察尚書省一司是也
宋朝會要曰國家每入閣國忌臨昧差六察吏察兵
察戶察刑察禮察工察元豐中神宗始置六察司于
御史臺

知雜

唐武后以來呼侍御曰端公侍御之職四自雜侍臺

侍悉總判之故知雜事者曰雜端後又有以郎中員外兼侍御而知雜事者亦呼雜端官制行省之

左右巡

唐會要曰貞元十年四月勅準六典殿中侍御史分知左右巡察其不法之事按六典自明皇時作則左右巡之置亦其時事也通典曰殿中侍御史自開元初知左右巡百僚班序有雜立失言頑而不肅者則以禮罰之是則此制自開元始也李肇國史補曰玄

宗開元初至天寶末年置御史左右巡使也

臺簿

漢有此官張忠為御史大夫署孫寶為主簿是也疑漢官云宋朝會要曰淳化四年六月始置二人後止一員也

檢法

唐置御史臺推直官而無檢法宋朝元豐中神宗正官制除推直始置檢法之官

六傳

夏商雖世嗣而太子之名亦畧矣其師傅之官亦無
文至周始見文王世子故禮之所記班班僅可推攷
文王世子曰凡三王教世子立太傅少傅以養之太
傅在後入則有保出則有師則太傅之原槩舉于此
矣武王又稱太子也漢止有太傅少傅至晉有天下
愍懷建官乃置太子太師太傅太保有三少為六傳
也漢賈誼上疏云保保其身體傅傳其德義師道之

教訓此三公之職也又于是為置三少皆選天下之
端士故太子聞正言行正道習與正人居不能無正
則六傅之說似漢有之然諸傳無其說亦可疑焉

賓客

漢高祖欲易太子呂后用留侯計迎四皓以定太子
故賓客之名始起于此孝文為太子立思賢苑以招
賓客孝武為太子立博望苑使通賓客洎晉愍懷建
宮惠帝使衛庭司馬畧等五人更往來備賓友雖非

官而謂之東宮賓客唐顯慶元年正月以于志寧等
為太子賓客遂以名官定置四人蓋取法于四皓

詹事

秦官掌太子家歷代因之通典曰東宮官序秦漢加
置詹事庶子及諸府率官也應劭曰詹省也給也漢
官儀曰秦官竇嬰景帝即位為詹事孔霸宣帝時為
太子詹事

庶子

禮記燕義曰古者周天子之官有庶子周禮夏官司馬之屬謂之諸子秦置中庶子詹事員漢因之晉以為東宮官晉書鄭默為中庶子朝官以為太子官是也隋分左右通典曰品官命數篇漢有太子庶子魏有太子中庶子則非晉以為東宮官也

少詹

唐始于詹事府置少詹事一人以貳詹事

諭德

唐龍朔二年初置太子左右諭德蓋取文王世子教之以事而諭諸德之義

太子侍讀

漢宣帝詔王褒等皆之太子宫娛侍太子朝夕誦讀此蓋其始也宋有諸王侍讀唐貞觀中許叔牙為王侍讀高宗升春宮仍兼侍讀職林云開成元年十一月宰相李石奏置太子諸王侍讀

太子侍講

後漢張酺以尚書講論授皇太子其事始見于此魏
官品始有太子侍講此置官之始也

中舍人

晉咸寧中初置太子中舍人官宋朝神宗又置之唐
以來有太子中舍而無中舍人

舍人

秦官唐龍朔二年改為太子右司議郎咸亨元年復
為太子舍人宋朝初亦不置神宗正官制復置之

翊善

宋朝王府之官多省不置別置翊善曰某王府翊善
蓋古上傳之任而輕其名位也宋朝會要曰太平興
國中始置也又云八年三月以戴元為衛王府閹象
為廣平王府楊可法等為皇太子翊善蓋自此始也
王侍讀

宋武帝初以徐受為晉安王子勛侍讀此王府侍讀
之初也唐志曰開元初十王宅引辭學工書者入教

亦為侍讀

王侍講

宋朝省王府餘官而別置侍講一員

記室

魏置太祖以陳琳阮瑀為記室掾其官始見于魏武
之世矣宋用晉制自明帝後皇子弟雖非都督亦置
記室參軍則記室而為參軍晉官也宋朝亦置于諸
王府曰某王府記室也

宮教

宋朝會要曰至道元年以孫嬪充皇姪皇孫教授從新號也時中書言唐文宗朝李石奏太子有侍讀諸王亦有無隆殺今皇姪皇孫官是環衛請以教授為名此蓋王宮教授設官之初也

九寺卿少部二十四

九卿

禮記曰夏后氏百官始置九卿漢九卿俱不以卿名

官梁武天監七年始加卿字

少卿

後魏官氏志云大和十五年初置少卿以卿為大卿

太常

亦周禮春官職也秦有奉常漢初改曰太常蓋秦官也初學記曰高祖改漢百官表曰景帝中六年更

太常丞

秦置官漢為太常亦曰太常丞

太常簿

漢有之疑漢官

太常博士

魏官也魏文帝初置之顏師古注漢書曰太常王者
旌旗畫日月大事則建以行禮官主奉持之故曰奉
常後改曰太常尊大之義也

協律郎

漢武之置協律都尉以李延年始為之晉改為校尉

後魏曰協律祝蓋漢武以延年善新聲故特為置協律

奉禮郎

漢大鴻臚有治禮郎蓋設官之始也按通典歷代皆為治禮郎唐初亦有掌設板位執儀行事永徽二年以諱改為奉禮杜佑云奉禮本名治禮國家撰五代史志至永徽七年乃成于時此官已改故北齊及隋治禮皆為奉禮奉禮之名雖見于史其改始自永徽

太祝

商官六太其一曰太祝在周禮為禮官宗伯之屬掌六祝之詞秦漢有丞隋除令丞止存太祝

齋郎

魏始有太常齋郎唐有太廟郊社之別唐洎國家其久次者太廟又補室長郊社即補掌坐掌次謂之黃衣選人祖宗以來又以為朝臣子弟起家之官

郊社令

梁始有太社令後周為司社上士隋于太常寺置郊社署名為郊社令宋朝避英宗嫌名改曰局

籍田令

周為甸師漢文帝初立籍田乃置令也

太醫令

周禮天官冢宰之屬有醫師上士下士掌醫之政令聚毒藥以供醫事秦為太醫令丞漢因之

宗正

周官也在周禮實小宗伯之職宋百官春秋曰周封兄弟之國十有五同姓之國三十有五選其宗中之長而董正之謂之宗正秦因其說置宗正兩漢晉授皇族不雜姓晉始兼庶姓也舊唐志曰星經有宗正在帝座東南漢高紀七年二月置宗正官以序九族宗正寺丞

漢置官亦用公族

宗正簿

梁置官也

宗正司

林希兩朝寶訓曰景祐三年仁宗謂輔臣曰宗室子
孫衆多聚居必以尊賢者糾合之詔置大宗正司擇
祖宗後各一人命之首以濮安懿王與守節任其事
後又有同姓庶官知丞事神宗時乃參用

光祿

漢書曰秦郎中令掌宮殿掖門武帝太初元年更名

光祿勳通典云梁除勳字曰光祿卿續事始曰秦掌
宮殿門戶郊祀主諸郎將在殿中侍衛北齊兼掌膳
隋全掌諸穀膳不掌宮殿

光祿丞簿

皆漢所置應劭曰光明也祿爵也

太官令

周官膳夫庖人外饔皆其任也秦置太官令屬少府
漢不改晉屬光祿後魏分太官為尚食知御膳太官

掌百官之饌

衛尉

秦官也掌宮門衛屯兵之職尉尉也古兵獄之官皆以尉言所以尉羅奸邪也

衛尉丞簿

皆秦漢所置也

太僕

周禮夏官司馬之屬有太僕下大夫尚書冏命穆王

命伯冏為周太僕正則太僕周官也應劭曰蓋大卿
衆僕之長

太僕寺丞

秦漢有此官也

太僕簿

梁始于太僕置主簿

大理

齊職儀曰古官也管子曰黃帝得后土辨于四方使

為理春秋元命包曰堯為天子得臯陶為大理舜時
為士官韓詩外傳有晉文公使李離為大理春秋左
氏傳衛侯與元咺訟士榮為大理寺序楚昭王石奢
為理則大理之名自古有矣秦為廷尉漢景帝中元
中更名大理蓋漢復古號也舊唐書志曰取天官貴
人之牢曰大理之義即周禮士師之職孟詵錦帶前
書載三代法官之名周曰士夏曰大理也

大理寺丞

晉武帝咸寧中曹志請廷尉置丞北齊曰大理也

大理簿

通典所載自魏晉以來歷代皆有之是疑魏置官

大理正

秦置廷尉正禮記曰獄成告于職之正注云正周禮鄉師之屬則秦之置官亦法周也其名亦隋改云

司直

後魏永安二年御史中尉高穆奏置大理司直漢武

初置司直之官屬丞相府謂之丞相司直疑大理之
置司直亦取漢丞相司直為名爾淮南子曰湯有司
直之人許慎注云司直官名詩鄭風曰邦之司直然
則漢之令官亦法古爾

評事

漢宣帝地節三年初置廷尉左右評魏晉無左右直
曰評隋煬帝始曰評事

鴻臚

周官大行人也干寶曰亦周禮象胥之職漢書曰秦
為典客掌諸侯四方歸義蠻夷漢改曰大鴻臚徐堅
云漢改之漢百官表曰太初元年更也梁除大字應
劭曰鴻聲臚傳之也傳聲贊道也劉熙曰鴻大也臚
陳也欲大以禮序陳賓客也馮鑑續事始曰楚云連
敖漢為典屬國按漢世典屬國自為一職非鴻臚之
任也

鴻臚簿

唐因陳隋之舊有鴻臚主簿一人

鴻臚寺丞

秦典丞也其名蓋隋所改

司農

少昊九農正也舜為后稷秦為治粟內史漢景更為

大農令武帝太初元年改曰大司農魏文帝黃初中

止曰司農

司農寺丞

秦治粟丞也漢置丞十三人為勸農官後改司農亦曰司農丞

司農簿

晉太康中始置司農主簿

太府

周禮天官冢宰之屬有太府下大夫梁武帝天監七年始置太府卿續事始則云梁天監中置少府卿後魏大和中改

金史卷五
太府丞簿

周禮太府上士即丞職也下士即簿職也梁置太府卿則丞簿二官亦梁置也續事始曰魏也

秘殿掌貳部二十五

秘書監

漢桓帝延熹二年始置秘書監一人

秘書少監

隋煬帝始置秘書少監一人

秘書丞

齊職儀曰漢獻帝置秘書令丞二人魏文帝分秘書別掌文籍自置丞一人此蓋置官之始也或曰魏武帝置也

秘書郎

通典曰後漢馬融為秘書郎當是其官自漢置也職林曰魏官也初漢置秘書郎蓋中書之任魏分秘書掌文籍為秘書郎中宋除中字

校書郎

又曰西漢蘭臺後漢東觀皆藏書之室當時文士雖校于中故有校書之職而未為官後以郎居其任故謂之校書郎元魏始命以為官續事始曰續漢書云成帝置以傳毅馬融為校書郎掌審定讎校圖書

正字

漢桓初置秘書監掌圖書古今文字考合同異今正字之官蓋其遺意也齊集書省有正書官北齊始為

正字

著作郎

漢東京使名儒碩學入直東觀撰述國史謂之著作
以他官領之未以為官也魏明帝太和始署著作
郎晉元康二年又謂之大著

著作佐郎

魏氏又置佐著作郎宋齊已來遷佐于下曰著作佐
郎

太史令

少昊鳳鳥氏為歷正夏后曰太史周禮為春官宗伯之屬秦為太史令唐乾元元年改曰司天監宋朝神宗正官名復為太史令

太史正

唐長安二年置太史令二人開元以後以令為監改令一員為少監國家亦曰司天監少監官制改除少監置太史正

太史丞

司馬彪續漢書曰太史有丞一人歷代同之疑漢官也

直長

後漢有太史長隋城門御府殿內皆有直長而太史無之宋朝正官神宗始置太史直長

五官正

通典曰唐乾元元年改太史局為司天置五官正謂

春夏秋冬中五官也

靈臺郎

唐改太史為司天監掌天文歷數風雲氣色吳小史有靈臺郎時乾元元年也

保章正

周禮春官宗伯之屬有保章氏掌天文以志星辰日月之變動辨其吉凶此蓋其官之始也唐乾元元年改監其小吏有保章正則是唐改周官保章氏為正

也

挈壺正

又夏官司馬之屬有挈壺氏掌挈壺以令軍井然則亦周置官也唐乾元元年始改太史為司天其小吏有靈臺郎保章正也

殿中監

魏始置殿中監蓋分門下太僕二局以為其職也

殿中少監

隋煬帝大業中初置殿內少監唐復殿中之名亦曰
殿中少監

殿中丞

此官蓋與少監同隋大業三年所置也其名改易同
少監云

奉御

北齊門下省初置典御之官隋改曰奉御以隸殿中
省

尚食

如淳曰掌天子之物曰尚秦置六尚乃有尚食則尚食秦官也

尚藥

梁陳以來皆為太醫兼職亦秦所置六尚之一也

尚醢

唐已前有尚乘無尚醢宋朝元豐中官制行則置此官也

尚衣

周有司服為禮官之屬戰國始有尚衣尚冠之職北齊制主衣隋復曰尚衣也左氏曰昔虞闕父為周陶正注云陶復陶也陶正主君上之衣服此尚衣之始也

尚舍

周禮天官有掌舍凡舍事則掌之漢官有守宮舍于魏則殿中職也隋煬帝別置殿內監改舊殿中局曰

尚舍

尚輦

周官有巾車秦漢為車府令隋煬帝初置殿內省置
尚輦也

五監總率部二十六

國子祭酒

孫卿在齊為三老稱祭酒漢吳王濞為劉氏祭酒又
漢博士內聰明有威重者一人為博士祭酒胡廣曰

凡官名祭酒皆一位之元長古者得主人饌則老者
一人舉酒以祭地故以祭酒為稱晉咸寧中初立國
子學始置國子祭酒六帖曰堯典克明峻德以親九
族九族既睦平章百姓周封兄弟同姓成王時彤伯
為祭酒主親屬秦漢因之又曰高祖七年自櫟陽從
長安置祭酒官續漢書有祭酒一人掌錄叙王國嫡
庶及宗親遠近郡國歲所上宗室名通典云

國子司業

隋煬帝大業三年始于國子監置司業官取禮記樂正司業之義

國子監丞

亦隋官置與司業之官同置也

國子主簿

北齊初置國子主簿

國子博士

班固云六國時往往有博士漢多至數十人晉武初

立國子學始置國子博士之官漢百官表曰博士秦
官通古今

太學博士

通典曰漢武建元五年初置五經博士按趙岐孟子
題辭云漢興孝文欲廣游學之路論語孝經孟子爾
雅皆置博士後罷傳記博士獨立五經而已此今太
學博士之職也自江左增置國子博士十六人始謂之
太學博士品服同國博神宗元豐中官制行改舊直

講之官復置太學博士職如經博士也

武學博士

宋朝神宗熙寧中即武成王廟建武學置教授如國子監置講官制行亦改為武學博士

律學博士

晉初置律學博士屬廷尉衛覲奏請置律學博士輔相教授唐移屬國子監唐志曰武德初也

太學正錄

宋朝仁宗時胡瑗掌太學其正錄第補諸生以為學校職掌然不以命有官者神宗熙寧末興三舍始勅授命官亦為學官之例

少府監

秦置少府漢以來為九卿後魏孝文太和中易官品改少府曰太府隋煬帝大業五年又分太府監蓋少府之名本起于秦而為監自隋始也秦掌山海池澤之稅其屬官有尚方典工作事今少府所職乃漢尚

方之事云

少府少監

隋始以少府為監又置少監以貳監事

少府監丞

漢所置官

少府主簿

晉初置之

將作監

少昊五雉為五工正與唐虞之共工周官考工之所
記皆將作之任也秦始置將作少府漢景帝更為大
匠隋開皇中改將作寺曰監故大匠之名亦更為監
將作少監

隋開皇二十年改將作大匠為大監初加置副監煬
帝大業五年改曰少監

將作監丞

漢置將作丞隋改監亦曰監丞

將作主簿

晉將作置主簿員

軍器監

後周武帝初置軍器監則其官自宇文周始也

軍器少監

唐開元三年始于軍器監置少監及丞簿

都水使者

舜命益作虞蓋掌山澤之官周禮地官司徒之屬川

衡澤虞即都水之任也秦始有都水長丞漢武元鼎二年初置水衡都尉又以都水官多復置左右使者此蓋設官之始也晉武省水衡置都水使者自此官名乃定

都水監丞

秦有都水丞漢又有水衡丞蓋武帝置水衡即置之也晉除水衡有都水丞亦先秦之舊云

都水主簿

晉初于水衡有其官後隨府改也

環衛中貴部二十七

上將軍

史記曰義帝以宋義為上將軍漢以呂祿為上將軍
魏黃初中有上大將軍唐貞元二年九月諸衛上將
軍也老子曰君子用兵則貴右是以偏將軍處左上
將軍處右說苑田忌奔楚王問齊楚相并柰何對曰
齊使申孺將則楚發五萬人使上將軍將之則是春

秋逮戰國始有上將軍之官也

大將軍

戰國時始有大將軍之號隨事即置亦不主官劉劭
爵制以謂秦十八爵大庶長即大將軍也左右庶長
即左右偏裨將軍也楚懷王與秦戰秦虜其大將軍
屈平是也項羽時范增稱大將軍漢遂置大將軍開
府如三公至煬帝于諸衛悉置

將軍

周禮天子六軍軍萬二千五百人其將皆命卿蓋在國稱大夫在軍稱將軍自晉獻公作二軍而公將上軍故將軍之名特出于此左傳閻沒女寬皆謂魏獻子為將軍後漢百官志云初漢武將軍始自秦晉以為卿號七國皆有其事漢以來其命官之名極多謂之雜號也

諸衛

左傳楚潘崇掌環列之尹謂宮衛之官列兵而環王

宮漢京師有南北軍掌理禁衛武帝初置衛將軍此
名衛之始也秦有衛尉掌門衛則衛亦先秦之舊制
爾晉武重兵官選清重之士置中軍以統諸宿衛此
諸衛之始也

金吾衛

秦有中尉漢武帝太初元年更名執金吾蓋取執金
革以禦非常也周隋為武侯之職唐龍朔二年改左
右金吾采古名也

左右衛

漢有衛將軍魏末晉文王又置中衛武帝受禪分中衛為左右衛會要云唐武德元年因隋舊制有左右翊衛五年去翊字但曰左右衛矣

驍衛

漢有驍衛將軍謂之雜號武帝始以李廣為之梁武帝天監六年分左右

武衛

後漢末曹公為丞相有分營魏武帝置武衛將軍隋始分左右續事始曰魏許褚從太祖破馬超遷武衛中郎將武衛之號自褚始也

屯衛

隋初為領軍府煬帝改為左右屯衛唐為威衛五代周太祖時避名復曰屯衛也六帖曰漢宣帝即位初置屯衛

領軍衛

魏武為漢丞相相府自置領軍非漢官也建安十二年改中領軍文帝受禪始置領軍將軍晉武初有左右

監門衛

舊唐志曰漢魏曰丞門校尉隋初有監門府將軍唐龍朔二年改府為衛

千牛衛

宋謝綽拾遺千牛刀人主防身刀也義取莊子庖丁

解剖千牛而刀刃若新發礪之義故後魏有千牛備身掌執御刀唐顯慶五年始置左右千牛府龍朔二年改府曰衛

諸率

自秦漢始有諸率以為東宮禁衛晉始置五率歷代因革不常遂分左右也

府率

秦官也晉武建東宮始置率此其始也

副率

隋制諸率府各置副率掌貳率事

衛率

秦置衛率府後漢主門衛晉武太始五年分左右

司禦率

隋文帝制左右宗衛其官如左右衛煬帝改曰率唐
龍朔二年改為左右司禦衛後復曰率

清道率

隋文帝置左右虞侯各置開府一人唐龍朔二年改為清道衛開元初為率府

監門率

隋有左右監門率掌門禁唐志曰武德五年改左右宮門率也

內率

隋置左右率掌禁內侍衛唐為左右內率舊唐志曰隋初置左右內率府擬上臺千牛衛也

南班

筆談曰宗子授南班官世傳王曾為相日始開此議不然也故事宗子無遷官法唯遇稀曠大慶則遷一官景祐中初定祖宗並配南郊宗子緣大禮乞推恩自此遂有南班之授近屬自初除小將軍七遷為節度使遂為定制熙寧元豐間袒免之外例授小使臣同庶官也

內常侍

秦置中常侍官參用士人給事殿省隋避諱改內常侍

內給事

周禮內小臣之職也後魏有中給事中後為中給事
煬帝改曰內丞直唐曰內給事神龍元年内侍省屬
有內給事八人是也宋朝不置臨事或攝

都知

宋朝會要曰國初有內中高品都知押班今置都都

知副都知並在景德三年五月云爾然則其官自國家始也

押班

國初有內中高品班院有押班後隨省改易其名號宋朝會要曰初押班無他職或加檢校官淳化後始以崇班以上充此押班之始也

內供奉

宋朝會要曰雍熙三年置入內供奉官大中祥符二

年二月宣入內侍省供奉官改為內侍省內
東西頭供奉官內侍省供奉官亦同此例

殿頭

又曰太平興國八年始有內殿頭高品大中祥符
三年二月宣入內侍省殿頭高品為內侍殿頭

高品

宋朝太宗興國八年又置高品至真宗祥符二年始
為內侍高品云

高班


又曰雍熙三年置入內高班內品大中祥符二年二月宣改高班內品曰高班

黃門

漢明帝永平中始置小黃門宋朝會要曰國初黃門初補止曰小黃門經恩遷即為黃門黃門蓋漢官也歷代有黃門侍郎今門下侍郎是也

內品

宋朝會要曰雍熙三年置入內高班內品祥符二年
改定有祇候高班內品祇候內品小內品雲韶部內
品小內品入內內品掌門內品後苑內品散內品等
神宗正官止存內品之名餘皆省也



事物紀原卷五

欽定四庫全書

子部
事物紀原卷六

詳校官中書_臣李彤

侍讀_臣孫球覆勘

總校官中書_臣朱鈐

校對官助教_臣蔡鎮

謄錄監生_臣胡曉春

欽定四庫全書

事物紀原卷六

宋 高承 撰

橫行武列部二十八

內客省使

唐初諸功臣傳往往有內客省之語而今有內客省使蓋唐所置也

客省使

漢有公車司馬令掌天下上章四方貢獻闕下蓋唐

客省之職也唐會要曰永泰以後多事四方奏計或連歲不遣乃于右臺門置客省以居之上書言事藩戎將吏蓋于此待報唐書李師道使崔承慶入奏待命客省是也會要曰昭宗天祐元年四月敕有客省使疑自代宗以來始命其官也

引進使

五代會要曰梁雜使有引進使宋朝會要曰五代有內外馬步軍都頭蕃漢都引進使疑梁官也

四方館使

通典曰魏改漢大行令為客館今宋初置南北客館
周署東西南北四掌客後為四方館宋朝會要曰唐
四方館以通事舍人判隸中書省宋朝初以檢校官
判館事淳化四年改置使名則四方館使自宋朝太
宗始也

閤門使

唐會要昭宗天祐元年四月勅有閤門使五代會要

梁諸使亦有東西二上閤門使疑亦唐官也

帶御器械

宋朝會要曰國初以來選三班以上武幹親信者佩
橐鞬御劔或以內臣為之咸平元年四月以石知顯
綦政敏並帶御器械云初止名御帶至是改焉

通事舍人

堯之試舜賓于四門秦置謁者漢以掌贊喝蓋通事
之職也魏置中書通事舍人後除通事為中書舍人

掌詔命而通事別為一職隋有通事謁者唐武德四年改曰通事舍人唐志曰東晉有通事舍人唐隸四方館屬中書省也今以為武臣閤門職事官隸閤門也

閤門祇候

宋朝會要曰故事閤門無通事舍人通事舍人隸中書省其長一人判四方館謂之館老如抽赴閤門祇應者則兼稱閤門祇候按唐武德中改隋通事謁者

為通事舍人則閣門祇候之名疑亦武德以來始有其稱也宋朝遂別以命官為通事之次

樞密承旨

宋朝會要曰五代樞密有承旨以諸衛將軍充宋朝始有樞密都承旨副承旨又別置諸房副承旨也

延福宮使

又曰明道元年置延福宮使蓋仁宗之初年置也

景福宮使

又曰大中祥符五年宣政使劉承珪以久疾辭職特置是名在客省使之上又曰大中祥符五年十二月以宣政使劉承珪為景福宮使初承珪乞退宰臣請別加美名真宗曰可特置景福宮使自此始也

宣慶使

又曰舊諸司使止于宣政大中祥符元年東封禮畢宣政使李神福當遷職特置宣慶使名授之也

宣正使

又曰淳化五年以王繼恩有平賊功特置此名授之
談苑曰太宗時內侍王繼恩平蜀李順之亂中書議
以為宣徽使上不欲宦者預政召張洎錢若水議置
宣正使在昭宣使之上會要又云五年八月也

昭宣使

又曰淳化四年置昭宣使初以皇城使王延德王繼
恩莊宅使杜彥鈞為之又曰諸司使舊無此額詔旨
特置在此年二月也

內殿承制

又曰大中祥符二年正月詔置內殿承制班在內殿
崇班上秩比殿中丞

內殿崇班

又曰淳化二年正月詔置內殿崇班在供奉官之上
餘見侍禁條

供奉官

唐則天寶錄曰如意元年置內供奉玄宗時有翰林

供奉唐百官志云兩省自侍中中書令已下盡名供奉官此名供奉官之初也筆談曰供奉官本唐從官永徽已後人主多居大明宮別置官謂之東頭供奉官西內具員不廢則謂西頭供奉官宋朝太宗淳化中以供奉有四十年不遷者陞授崇班則是五代以來為武臣之職也

左右侍禁

談苑曰本朝太宗雍熙四年增置左右侍禁宋朝會

要曰淳化二年正月置左右侍禁在殿直之上先是供奉官殿直有四十年不遷者故特置崇班侍禁之目

左右殿直

左右殿直梁開平三年七月勅有殿直之文又元年宣下宣徽院收管殿前受旨官左右內直等後唐清泰元年七月有殿直都知趙處愿晉天福六年七月勅亦有殿直文則殿直之官梁已有之也

三班奉職

談苑曰宋朝建國之初承舊制有殿前承旨雍熙四年改為三班奉職宋朝會要則其事在淳化二年正月改也

三班借職

談苑云舊制有借職承旨太宗雍熙中改曰三班借職會要以謂淳化二年正月也談苑又云自供奉至借職其員無數亦漢三署郎比也按今自崇班以上

曰大使臣供奉以下至借職為小使臣也

東西使班部二十九

諸使

宋朝會要曰唐制百職皆九寺三監分典開元中始置諸使朝廷有詔則云諸司諸使以該之

皇城

唐書朱泚傳曰泚以李忠正為皇城使蓋名官之事始見于此太平興國六年十一月改武德司為皇城

司故宋朝諸使有皇城使

翰林

宋朝會要曰唐有翰林使掌技術之待詔者五代有翰林茶酒使宋朝初有茶床使後止云翰林使

尚食

秦置尚食歷代為奉御屬殿中省今有尚食奉御是也唐別置尚食使故五代會要梁諸司使有尚食使也

御厨

唐會要昭宗天祐元年四月勅有御厨使

軍器

唐會要曰乾元元年六月勅軍器監改為軍器使以
內官為之又曰六月十二日廢置使也宋朝會要曰
開寶四年五月以軍器使楚昭輔為左驍衛將軍則
是國家緣唐制有其官也

儀鸞

宋朝會要曰唐置營幕使後置同和院梁開平初改儀鸞院使宋朝置儀鸞使

弓箭

又曰唐有內弓箭庫使宋朝因之後去內字而五代會要梁諸使有弓箭庫使高彥休闕史中亦載莊宅內弓箭之名蓋唐官云續事始曰唐明皇開元年初天寶末置內庫諸使

尚衣

又曰宋朝初置內衣庫使後省內字又云大中祥符二年七月改內衣物曰尚衣疑取此義也

綾錦

唐書百官志少府所隸武后垂拱元年有綾錦坊宋朝會要曰乾德年以平蜀所得錦工置綾錦院疑自此始置使也太平興國二年分東西

八作

續事始曰唐玄宗置內八作使宋朝會要曰舊八作

太平興國二年分東西馮鑑又引李肇國史補云玄宗開元初至天寶末所置使有內八作使

牛羊

通典曰太僕之屬北齊有牛羊置令宋朝會要諸司使副有牛羊使諸司庫務有牛羊司開寶二年六月詔文已有大祀所供犢自今委牛羊司恭養之語疑國初官也

香藥

宋朝會要曰太平興國中以克平嶺南及交趾海南諸國連歲入貢通關市市人歲乘舶販易外物自三佛齊勃泥占城犀象香藥之物充牣府庫始議于京師置香藥權易院增香藥之直聽商人市之命張遜為香藥庫使以主之此蓋置官之初也

權易

又曰舊有香藥權易院因置使此其本也又曰大中祥符二年二月撥併權易院入權貨務而使名不除

也

毬毯

又曰唐有毬坊毯坊使五代合為一使宋朝因之

鞍轡

又曰唐神策軍有鞍轡庫五代置使宋朝因之

酒坊

又曰唐有酒坊使宋朝初加內字後去之

法酒

通典曰梁有酒庫丞宋朝會要曰周太祖平河中得酒工王思善造法麴因法酒庫置使蓋亦梁酒庫丞比也自皇城至法酒庫已上為東班

醫官

宋朝會要曰淳化五年八月以翰林醫官趙自化為少府監丞充醫官副使按唐會要貞元八年八月令侍御醫尚藥直長藥藏郎並留授翰林醫官然則醫官之置使當是唐官也

宮苑

通典曰宮苑總監自隋置掌苑內宮館園池之事蓋
宮苑之職也唐會要曰開元十九年湯崇慶為五坊
宮苑使本一使也唐末始分之唐書友鎮表曰開元
二十年置宮苑使朔方節度兼之又會要曰太和九
年十一月又有開廐宮苑使然則宮苑唐官也五代
會要梁諸司使亦有宮苑使李肇國史補曰開元之
前有事於外則命使自置節度始有坐而為使者後

又有宮苑使

驎驎

宋朝會要曰唐有飛龍使及小馬坊使後唐長興元年改飛龍院為左飛龍院小馬坊為右飛龍院太平興國三年改左右天廡坊雍熙二年始曰左右驎驎院使名從之此左右驎驎使副之始也

內藏

又曰太平興國三年十月初置內藏庫及使名也

左藏

唐百官志曰開元十九年以監察御史一人監左藏庫後以殿中侍御史一人為左藏使此蓋設官之本也宋朝會要曰唐以太府卿知左藏庫出納五代有使宋朝因之

作坊

唐百官志曰少府之屬有金銀作坊院宋朝會要曰唐有作坊五代置使宋朝因之

莊宅

李吉甫百司舉要曰則天分置莊宅使又曰司農別有園苑莊宅使馮鑑續事始則云玄宗置唐會要曰昭宗天祐元年正月勅亦有莊宅使也李肇國史補曰玄宗開元止天寶末置使有莊宅使

六宅

宋朝會要曰唐置十宅六宅使以諸王所屬為名或總云十六宅後止云六宅宋朝因之

文思

五代會要曰梁諸使有文思使又云開平元年五月
改為乾文院使三年十月以乾文院為文思院後乾
文却置院文思自為一使宋朝會要曰太平興國三
年置文思院亦有文思使

內園

李吉甫百司舉要曰則天分置園苑使後改曰內園
又曰司農別有園苑使唐會要貞元十四年夏旱吳

奉奏有內園使又五代會要梁諸使有內園栽接使也

洛苑

唐會要曰武德九年七月十九日置洛陽宮苑監永淳元年五月十一日置東西監管諸園苑至開成五年四月勅總監宜令內司管仍別置使此疑其洛苑置使之本唐書馮鑑傳有洛苑使姚文壽縱部曲奪民田則其官始見於此會要梁諸司使亦有洛苑使

也

如京

如京唐主倉官也唐會要曰文明元年準吏部式監太倉本是察院職務第一人監倉近移入殿院太和九年六月李固言奏殿中侍御史充監太倉使唐志云開元十九年以監察御史充太倉出納使五代梁諸使始有如京使當是梁改太倉使曰如京也蓋取詩曾孫之庾如坻如京之義張緒續錦里耆舊傳王

蜀亦有如京副使黃筌也

崇儀

宋朝會要曰唐有閑廐使太平興國五年改名崇儀也

西京左藏

又曰真宗咸平三年五月八日以贊善石熙政為西京左藏庫副使前此無見疑國初所置官也蓋唐都京兆為西京不得以別都直稱左藏也五代殘缺別

都因不言具故事耳

西京作坊

又曰太祖開寶六年七月錄遺以尹崇珂子昭言為西京作坊使餘如西京左藏說也

染院

周官有染人掌染帛秦為平準令隋有司染署唐又有染坊宋朝會要曰唐有染坊使太平興國三年分置東西染院使名亦改也

禮賓

唐會要曰天寶十三年三月二十七日勅鴻臚屬司
有禮賓院又元和元年六月置禮賓院于長興里其
使名疑自此有也五代會要曰後唐天成元年太常
禮院奏本朝故事諸蕃客並於內殿引對事在禮賓
使由此證知其官始自先唐也又長興三年三月有
禮賓使梁進德自契丹報聘迴也

供備

五代會要曰梁諸司使有武備庫使按其職非供備之掌也宋朝會要曰太平興國三年改供備庫為內物料庫而使名不改疑亦國初官也右自宮苑至供備庫使以上為西班

教坊

唐百官志曰開元二年置教坊于蓬萊宮側京都置左右教坊掌俳優雜劇以中官為教坊使此其始也又曰武德後置內教坊武后改曰雲韶府以中官為

使開元後始不隸太常也續事始曰玄宗立教坊以
新聲歡樂之曲優倡曼衍之戲因其諧謔以金帛章
綬賞之因置使以教習之國家乃以伶人之久次者
為使云

節鉞帥漕部三十

節度

後漢公孫瓚討烏桓詔令受劉虞節度唐室名使蓋
取此義唐制緣邊戎寇之地則加以旌節謂之節度

使始自睿宗景雲二年四月以賀拔延嗣為河西節度使也肅宗至德以後天下用兵中原刺史一例受號也唐書方鎮表云開元二十二年朔方節度始兼處置使兵志曰高宗永徽以後都督帶使持節者始謂之節度使然猶未以名官也

留後

宋武起義以孟昶總攝後事其伐荊州也以劉道隣監留府事此留後之始也唐開元之後凡節度入朝

或遙領不臨鎮則置留後以董軍事唐會要曰開元十五年十一月蕭嵩領河西二十六年正月李林甫領隴右楊國忠領劍南嵩以牛仙客林甫以杜希望國忠以李察崔圓並為留後此蓋置官之始也德宗貞元二年程懷直又自稱觀察留後故聖朝兼二使以名官

觀察

唐明皇開元二年置十道按察採訪處置使肅宗改

曰觀察處置新唐書方鎮表曰至德元載置觀察使
百官志曰肅宗乾元元年改也

防禦

武后聖歷元年以夏州領防禦使祿山犯順當衝諸
郡皆置之則是防禦使自則天始也職林云至德後
置舊唐書志曰至德後中原大郡要害之地置防禦
使以治軍事不賜旌節也

團練

肅宗乾元元年置防禦團練使馮鑑曰至德中觀風使并領都團練其後上州亦有其號唐百官志曰元載秉政恩結人心刺史皆得兼團練使元載傳曰載用事授刺史者悉帶團練使以悅人心

宣撫

宋朝會要曰咸平三年六月詔遣參政向敏中充河北東緣邊宣撫大使馮拯陳堯叟充副大使存問官吏自後隨事即置事已乃省蓋自此始也宣撫唐官

新唐書德宗詔蕭復充山南江湖等道宣撫安慰使是也見復傳

安撫

唐貞觀初遣大使巡天下諸州水旱則有安撫之名高宗時命裴行儉冊波斯王始為安撫大使天后時聖歷元年狄仁傑為河北道安撫此蓋其始也德宗貞元元年又置副使宋朝會要曰咸平三年十月以王欽若為西川梁顥為峽路安撫使但以觀省風俗

耳四年八月以張齊賢充涇源等十五軍州安撫經
略使帝以邊將玩寇始改命齊賢等使自此始為邊
帥也又景德元年五月以知永興軍向敏中充峽路
緣邊安撫使先是賊遷死延州鈐轄張崇貴乞朝廷
遣使弔問仍望遣大臣至邊上召賊所親信張浦定
議故命敏中經度之十月以知青州張齊賢兼青淄
維等州安撫使并兵馬巡檢賊盜公事自此又為內
地帥座之任

經略

唐太宗貞觀中邊州別置經略使此蓋使名之起也
高宗儀鳳二年以黑齒常之為河源軍經略大使宋
朝會要曰舊不常置皆因事命使寶元以來陝西緣
邊大將皆兼經畧也宋自咸平四年八月張齊賢為
涇源安撫又始以安撫使兼經畧云

招討

唐百官志曰招討使掌征伐兵罷則省云天寶末置

招討都統之名始於此事始云開元十七年宰相奏
置招討使天寶十五載以來瑱為潁川太守兼招討
使職林曰貞元時置注又云德宗建中年以馬燧為
魏博招討使舊唐志曰貞元末置用兵權兵罷則停
也

總管

晉有都督諸軍事後周改為總管唐武德初邊要之
地亦置總管以統軍貞觀三年李靖除定襄道大總

管是也宋朝初有兵馬都部署治平初避英宗嫌名
改為總管亦法古號也續事始載周武帝建德六年
以王謙為益州總管記為命官之始

幕府

漢書李廣傳注晉灼曰衛青征匈奴大克就拜大將
軍於幕中故曰幕府幕府之名始於此也顏師古曰
幕府者以軍幕為義軍旅無常居止故以帳幕遮之
廉頗李牧市租皆入幕府此則非因衛青始有號矣

又漢文帝問馮唐唐對有上功幕府之說則上將之稱幕府其來久矣今人以稱元帥義取諸此

館接伴

宋朝會要曰景德二年五月詔將來契丹使至令諸司緣路供帳十一月命翰林學士李宗諤東上閤門使曹利用在京館伴契丹賀承天節使此疑館伴之始也又曰特已命樂黃同康京元詣雄州接伴迴日充送伴使此疑接伴之始也

發運

五代會要曰晉天福三年韓延嗣配華州發運務此始見發運之名宋朝會要曰乾德二年二月以何幼沖充京畿東西水陸發運使此始有發運使之官也至道元年始命王子興等為江淮兩浙發運使兼制置茶鹽事就淮南置局咸平二年仍領荆湖四年又加都大宰景德二年二月以馮亮為淮南江浙荆湖制置茶鹽兼都大發運使自是使名始定也又有三

門白波發運使太平興國五年正月命姚沆為陝府
三門發運此疑其初云唐書李傑傳進陝州刺史水
陸發運使置自傑始

發副

至道元年七月以楊允恭為江淮兩浙發運副使兼
捉賊制置茶鹽公事景德後亦有副使也

轉運

秦攻匈奴使天下飛芻輓粟漢蕭何漕運關中又漢

漕運山東粟以給中都即轉運之起也唐會要曰先天二年李傑為陝州刺史充水陸發運使開元十八年裴耀卿始為江淮轉運使此其命官之始也宋朝會要曰唐置江淮處置轉運使後置諸道鹽鐵轉運使多以重臣兼領而諸道各置巡院皆統於使五代罷巡院置轉運司國初但曰勾當某路水陸計度轉運事官高即曰使也

運副

開元中裴耀卿為江淮轉運使以崔希逢等為副此
蓋運副之始也宋朝會要轉運篇云太平興國初又
置副使也

運判

宋朝會要曰開寶五年八月九日以潘美尹崇珂並
兼領嶺南轉運使以轉運使王明為副使許允言為
判官則轉運之有判自此其始也太平興國三年四
月十日置諸道轉運判官始以戴允誠等分為之唐

會要云景龍二年七月置十道按察使分察天下令
轉運之兼按察者蓋始於此

府提點

又曰景德三年三月勅置開封府界提點司即置提
點之官呂夷簡三朝寶訓曰真宗謂近臣曰諸道刑
獄皆遣官提振唯京師無之去夏開封府訊進士蹇
符暴於日中裂其背而鞠之無狀炎暑之際罪未見
情枉罹虐毒令置司命京師刑獄處悉糾之

提刑

又曰淳化二年五月詔諸路轉運司各命常參官一人專知糾察刑獄公事始以司門董偁等為之至三年四月詔始稱提點刑獄景德四年六月真宗筆記六事一曰提點刑獄七月詔擇官提點諸路刑獄公事始命屯田李拱等為之

將領

宋朝神宗初置將官於諸路曰東南或西北等某將

有副掌春秋訓練有警則部所將兵以策應於是又有提舉將兵之官

都監

唐書白居易傳曰王承宗叛帝以吐突承璀率師出討居易諫曰唐家制度每征伐專委將率比年始以中人為都監韓全義討淮西賈良國監之高崇文討蜀劉正亮監之此疑其初也宋朝會要曰國初諸州都監或雜文臣其後遂罷止以武臣為之乾德三年

五月勅差起居舍人劉兼通判泗州兼兵馬都監是也太平興國三年五月以客省使翟守素為兩浙諸州兵馬都監此又國家命官之始也

監押

唐中宗始以中官監押兵馬宋朝諸州亦有兵馬監押小使臣以下即為監押大使臣已上曰都監張緒續錦里耆舊傳曰端拱元年春供奉官宿翰充成都府兵馬監押宋朝之置監押自此始

陵臺令

唐百官志有陵臺令初曰諸陵署令天寶十載改獻
昭等王陵署曰陵臺此蓋命名之初也漢有長陵及
文園令歷代皆有令丞宋朝會要曰乾德二年以河
南府鞏縣令孔美兼安陵令雍熙二年五月詔今後
注鞏縣令便令兼陵臺令公事景德四年正月詔永
安鎮特建縣其縣令兼陵臺令也蓋本周官冢人之
職掌公墓之比

撫字長民部三十一

留守

成王命君陳分正東郊成周通典記以李晦為西京
留守開元十一年太原府置尹以尹為留守謂之三
都留守唐志云車駕不在京則置留守此蓋命官之
始也宋朝則曰兼某京留守司事也

州牧

黃帝立四監以治方國舜外有州牧侯伯則州牧之

始蓋自有虞氏也

府尹

周成王之命君陳東郊曰尹茲東土春秋之時縣邑之長或曰尹楚有令尹此尹之始也漢京兆河南曰尹唐以州郡建府者皆曰尹按漢百官表曰右內史武帝太初元年更名京兆尹此名官之始也

都督

漢光武建武初權置督軍御史事竟輒罷魏文黃初

三年初置都督諸軍事然魏初受漢禪時已有持節
都督則非三年初置也大抵魏所建官耳明帝太和
四年秋始加大都督以命司馬懿唐太極初并益荆
揚開元中兼潞為五大都督也漢建安中魏武為相
始遣大將軍督之二十一年征孫權還使夏侯惇都
督二十六軍於是始有都督之官矣

刺史

先秦以御史監郡漢初省之惠帝復建監三輔郡文

帝十三年九月遣丞相史出刺并督察御史武帝元封五年又置部刺史察州晉以來任輕者加持節後周又加諸軍事唐武德後加號使持節某州諸軍事某州刺史宋朝以他官知州事而刺州不臨州以為武臣加官而已舊唐志云初漢奉使者皆持節故刺史臨部持節晉任重者為使持節都督后魏北齊加諸軍事也

知州

唐李師道之阻兵也。謂其弟師古曰：「是不更民疾苦，要令知衣食所從，乃署知密州。」唐會要曰：「太和四年八月，御史臺奏按大曆十二年五月一日勅：刺史有故，乃闕。但令上佐依次知州事，則知州之名自代宗始也。宋朝之制，自大都督府至下州，親王為大都督，庶姓為長史，餘使及刺史有故，及闕，但令上佐依次知州事。太祖始削外權，止令文臣權蒞，後為知軍州事二品以上，及帶兩府宣徽者，稱判國老閑談曰：太

祖嘗語趙普以唐室亂源在諸侯難制何術以革之
普曰諸列郡以京官知三年一替則無虞迄今行之
也

通判

國家初置諸州通判楊文公談苑云太宗始置即古
監郡也宋朝會要曰建隆四年四月令賈玘等充荆
南諸州通判又乾德四年十月詔書已有通判又建
隆乾德皆太祖年號則是此官之設自太祖始也按

唐室上州置長史一人掌通判州事則通判之名亦取唐制州長史之職為稱耳

勸農

漢承秦置大農丞十三人分一州以勸農桑力田者此勸農官之始也唐中睿之世州郡牧守皆以勸農名其官宋朝會要曰至道二年七月直史館陳靖言天下多曠土流民請置使招集八月以靖為勸農使按行陳許等八州勸民墾田其副皇甫選何亮以

為功難成願罷至景德三年二月詔諸路轉運開封知府諸知州少卿監以上並兼勸農使其餘如州軍通判並兼勸農事令自今除授依此

河隄

宋朝會要曰乾德五年正月詔開封大名鄆潼等十七州長吏並兼河隄使此蓋其始也晉東都省都水置河隄使者

簽判

宋朝之制諸州府幕官大藩鎮以京朝官簽署節度觀察判官者曰簽判治平中避英宗嫌名改署曰書宋朝會要曰景德元年十月以大理評事秘閣校理劉筠等分知天雄軍節度觀察判官事此蓋簽判之始也

判官

秦漢以來郡府之幕有掾史從事逮于梁齊亦無判官續事始曰隋元藏機始為過海使判官此使府判

官之始也唐景雲之後有節察防團等使亦各隨使置之五代留府軍監皆置焉監皆曰幕職或呼幕客舊唐志云皆天寶後置也馮鑑乃云開元後始有之尚為諸使官屬五代多故始領郡事以為州府職也推官

唐百官志曰節察防團使皆有推官舊唐書云天寶續事也

書記

漢書百官志曰三公及大將軍幕府皆有記室掌章表書記續事始引魏志太祖以陳琳阮瑤為記室文
帝與吳質書稱孔璋章表殊健元瑜書記翩翩宋江
夏王乃以丘源為掌書記而未為職名唐開元元年
勅節度置掌書記自後藩侯得自奏請也又魏志建
安中曹洪欲使阮瑤掌書記

支使

唐置觀察使亦置觀察支使則支使唐置官也續事

始曰唐至德初改採訪使為觀風始置判官二人支使二人推官一人也

軍判

五代會要曰後唐天成二年九月十九日勅刺史州不合有防禦判官今後改為軍判官此蓋置官之本也

軍巡

又曰梁開平三年十月置左右軍巡使各置巡院宋

朝會要曰唐末始置後唐分左右也舊開封府以牙校為之開寶六年六月改用士人李萼趙中衡太祖以刑禁之重始任士流也呂夷簡三朝寶訓曰開寶六年上謂近臣曰開封府左右軍巡諸州馬步判官比來所在止選牙校為之刑獄事重人命所繫自今當選士流任之也

參軍

杜佑云參軍後漢末置參諸軍府事若今節度判官

漢書曰靈帝以幽州刺史陶謙參司空張溫軍事此其始也本公府官晉始置其官於州郡唐諸曹皆稱之續事始以謂後漢置在州曰司

錄事

漢司隸屬有功曹從事史兼錄衆事在州為治中漢又有督郵主簿皆錄事之任也晉始置錄事參軍刺史有軍而開府者並置之本為公府官非州職也續事始曰後漢有郡主簿亦曰督郵隋以錄事參軍代

之掌勾稽文簿舉彈善惡監郡印給紙筆之事開元
初京兆河南曰司錄管六曹宋朝京邑大府以京朝
官領其事曰知其非京官而資考久次者亦曰知也
三輔決錄韋康成為郡主簿是也

功曹

秦漢有功曹史蕭何為書史掾功曹是也後漢有功
曹史主選功勞北齊為功曹參軍今止開封府置餘
州皆省也

倉曹

漢有倉曹史北齊以為參軍今亦獨開封府置也

戶曹

漢公府有戶曹掾主民戶祀農桑州郡為史北齊與功倉曹同為參軍唐諸府曰戶曹餘州曰司戶

兵曹

漢公府掾史有兵曹主兵事司隸屬官有兵曹從事史郡國為使北齊同諸曹為參軍今又獨置於開封

府也

法曹

漢公府掾史有賊曹掾主刑法曹之任也歷代皆有
或為法曹隋以後與功曹同陳孝意為東郡司法書
佐是也唐為參軍事

士曹

北齊始有士曹參軍今獨開封府置餘州雖有司士
又以為散官也

司理

漢公府有決曹掾主罪法事通典以為法曹之職白氏六帖則云魏置理曹掾蓋法曹也即今司理之任舊制諸州有馬步院及子城院主禁繫訊獄張緒續錦里耆舊傳曰開寶六年秋勅改馬步院為司理院廢馬步都虞候除文資為司理參軍成都雄藩一十六處置左右馬子城院不得禁繫公事呂夷簡三朝寶訓曰太祖開寶六年謂近臣曰諸州馬步判官比

來止選牙校為之刑獄人命所繫當選士流任之蓋自是始置司理之官也餘見軍巡條唐諸州有馬步使

文學

漢郡國皆有文學掾則文學漢官也唐會要曰大厯十四年十二月五日諸州府學博士改為文學品秩同參軍唐志曰文學州授於吏部然無職事衣冠恥之故朝以為散官炙轂子曰隋開皇中潞州刺史柳

昂表勸學帝令州置博士俾其教授唐肅宗時顏真卿曰文學蓋復漢舊號也

教授

隋有州博士潘徽嘗為之唐武德初府郡亦置經學博士掌以五經教授德宗即位改為文學元和中廢宋朝神宗元豐中興太學三舍以經術養天下之才又於諸大郡府始各置教授一人掌教導諸生如太學博士亦隋州博士之職也

縣令

周官有縣正下大夫春秋之時縣邑之長曰大夫秦
本紀曰孝公十二年并諸小鄉聚為大縣縣一令商
君列傳曰鞅令邑聚為縣置令丞則縣令及丞自秦
孝公始也漢百官表曰縣令長皆秦官萬戶以上為
令減萬戶為長宋朝會要曰周衰六國置縣邑其長
齊晉曰大夫魯衛曰宰楚曰公曰尹秦曰令曰長也
知縣

唐會要曰大中五年十一月景陵有賊斫損神門戟
架六年四月裴讓權知縣事蓋知縣之名始起于此
矣宋朝會要曰建隆四年六月詔河朔右地魏為大
名分治劇邑當用能吏思慎釐於縣務特選士於朝
行斷自朕心以重其任大理正奚嶼知大名府館陶
縣事監察御史王祐知魏縣楊應夢知永齊縣屯田
千繼徽知臨清朝臣知縣自嶼等始也

縣丞

史記商君傳曰鞅令邑聚為縣置令丞縣丞秦官也
宋朝會要曰天聖四年七月詔開封兩縣各置丞一
人在簿尉之上先兩縣簿尉多差出至是蘇耆上言
乃命增置此國家置丞之初也應邵漢官曰大縣丞
左右尉所謂命卿三人也今以京朝官領其任者曰
知縣丞自神宗朝增置也

主簿

漢有之後漢繆彤仕縣為主簿是也續事始則云後

漢始有主簿之號諸郡置之即今錄事參軍也至隋大業中諸縣始置主簿掌勾稽簿籍糾正縣內非違縣尉

漢百官表曰縣有丞尉長安有四尉分左右是也蓋亦漢官

都廂

國初以來以四廂都指揮使巡轄提舉京城裏諸巡警時謂之廂主凡煙火盜賊即部所轄以赴之諸公

事自答以下皆得區分神宗熙寧中置勾當左右廂公事所以文臣一員主之自鬪訟賊盜杖六十而下皆決之以分天府之劇也民間謂之都廂

別駕

唐六典曰後漢州置別駕歷代皆有之杜佑云別駕本因漢置隨刺史巡察若今觀察之有副使也宋朝與長史司馬並為散官云通典曰從刺史行部別乘一乘傳車故謂之別駕漢制也

長史

漢百官表曰秦置郡丞其郡當邊戍者丞為長史則
長史為秦所置官也通典曰唐五府長史理府事餘
府州通判而已

司馬

曲禮天子之五官有司馬周禮以為政官之率漢為
三公之任周政官之屬文有大小軍興行都家等職
本任武之官古者軍行則有之左傳晉悼公以魏絳

為中軍司馬是也魏晉以後刺史帶將軍開府者則置之自此始為州郡官唐高宗即位改治中為司馬節度亦有行軍司馬今與節度團練副使並以為貶責之官

醫學

唐會要曰貞觀三年九月十六日諸州府置醫藥博士開元十一年五月七日始置醫學博士唐志曰開元九年改醫藥博士為醫學也

助教

晉咸寧四年初立國子學置助教以教生徒魏始於
太醫置之唐國子四門俱有其官開元元年諸州始
置醫學助教宋朝神宗元豐中除之初宋朝唯以四
門國子助教命醫者故官制行唯置太醫及州助教
也

京邑館閣部三十二

京師

釋名曰國君所居曰都帝王世紀曰太昊都陳此稱都之初也三代而來夏曰夏邑商周曰京師京大也師衆也大衆所居故以名天子之都

京城

宋朝會要曰自朱梁建都以汴州為東京皆因藩鎮舊制但改名額而周顯德五年始廣新城周四十八里二百三十步宋敏求東京記曰周世宗顯德二年四月詔京城四面別築羅城三年正月發京畿滑

鄭曹之民命薛可言等四面督之韓通總其事王朴
經度凡通衢委巷廣袤之間皆朴定其制踰年而成
宋朝神宗熙寧中始四面築為敵樓作瓮城及濬治
壕塹也

門名

又曰太平興國四年九月詔改京城內外門名三十
有二即今名南薰宣化是也東京記曰外城諸門大
抵俱周顯德中築外城立也

保康門

又曰大中祥符五年七月詔曰重城陽位通門肇開
宜以京城新開門為保康門初建會靈觀於奉節致
遠二營仍作此門於朱雀門之東南闢街與觀北門
相直也

坊名

又曰至道元年十一月詔改京城內外坊名即今太
平義和等一百三十六是也太宗以舊名多涉俚俗

之言至是始命以美名易之唯寶積安業樂臺利仁
四坊仍舊東京記曰太宗命張洎改撰其名也新城
外坊至道中定後祥符元年始分置九廂及諸坊也
大內

又曰今大內即宣武軍節度治所朱梁建都遂以衙
第為建昌宮晉天福初又為大寧宮第改名號而已
周世宗雖加營繕猶未合古制建隆三年發開封浚
儀民廣皇城四年五月太祖遣有司畫洛陽宮殿按

圖修之自是皇居始壯麗矣

西京內

又曰唐蔡賊孫儒諸葛爽之犯洛陽宮闕燔燒殆盡
其後張全義為河南尹始加繕治累年方集宋朝開
寶八年十月遣使修也

西京殿

又曰太平興國三年二月詔改西京新修諸殿名今
太極天興等名是也

南京殿

又曰大中祥符七年二月真宗幸應天府詔升為南京正殿以歸德為名又以南門為崇禮雙門為祥輝
二月又賜南京諸門名

龍圖閣

又曰咸平四年十月以杜鎬為龍圖待制即建閣在
是年前矣又云真宗於會慶殿西偏藏太宗御製咸
平又真宗登極年號即建閣當在初年矣東京記則

云大中祥符初建以奉太宗御集而國老閑談乃有
太宗幸龍圖閣觀書之語

天章閣

又曰天禧五年二月於龍圖閣北起天章閣奉安真
宗御製既成令兩街僧道具威儀教坊作樂奉真宗
御集御書白玉清昭應宮安于閣上也此其始云東
京記曰天章閣天禧五年三月建以藏真宗御集

寶文閣

東京記曰本名壽昌閣與天章並建慶厯初改曰寶文仁宗聖文神翰秘于此也

資善堂

仁宗肄學之所也宋朝會要曰在元符觀南大中祥符八年置天禧四年徙御厨北也又曰祥符九年二月詔元符皇子就學之所宜以資善堂為名

繼聖堂

東京記曰太宗尹京命署東建堂習射大中祥符二

年閏二月真宗臨幸宰臣請以繼聖為名許之令人
呼曰繼聖堂

學士院

唐武德貞觀時溫大雅等以文詞召待詔常於北門
候進止玄宗開元二十六年始置學士院始改待詔
為翰林學士故也

史館

史職肇自黃帝而倉頡沮誦掌之周及列國亦有史

名漢武置太史公漢以後職在秘書唐太宗始置史館以修國史唐百官志曰歷代史官隸秘書省著作局貞觀三年閏十二月始移史館於禁中蓋自是始別局也

昭文館

唐會要曰武德四年正月置修文館九年三月改為弘文九月太宗即位弘文殿聚書殿側置弘文館神龍元年十月十九日改曰昭文後復曰弘文宋朝避

廟諱復曰昭文與集賢史館同為三館也神宗行官制皆隸秘書省青箱雜記曰本前世弘文館建隆中以犯宣祖諱改焉

集賢院

唐開元五年乾元殿寫四部書置麗正修書院於集仙殿十三年明皇召張說等宴集仙殿謂說曰今與卿等賢才同室於此宜改名集賢由是修書院亦曰集賢院

秘閣

宋朝會要曰端拱元年五月詔就崇文院中堂建秘閣淳化元年八月二十一日李至書言漢桓置秘書監掌禁中國書秘記魏以屬少府王肅表論不應屬少府曰魏之秘書即漢東觀因是不屬而蘭臺亦藏書故薛夏云蘭臺為外臺秘書為內閣然則秘閣之名始於此矣晉孝武勅徐廣料秘閣四部三萬餘卷是也

起居院

北齊有起居省宋朝會要曰淳化五年四月五日張
秘奏復左右史之職記錄以為起居注太宗從之置
院於禁中此其始也

四方館

沈約宋書曰高祖永初中置南小客館令主四方賓
客後為四方館此其始也

待漏院

唐元和中方置待漏院於朝門外令百官朝以避風
霜國史補云

皇城司

宋朝會要曰本名武德司太平興國六年十一月改
為皇城司東京記曰掌皇城管鑰木契及命婦朝參
顯承殿內取索事

內東門

又曰舊名內門取索司景德三年二月改為內東門

司三月鑄內東門司印給之東京記曰掌宣索庫務
寶貨及貢獻納于內中修造宴設事興國中置內庫
門取索司景德中改也

合同司

又曰天禧三年正月三司言使臣傳宣取物承前止
是口傳詔旨別無憑驗致因緣盜取錢物請下入內
內侍省傳宣令門司如有須索以合同憑由一本給
付逐處五年十一月鑄合同憑由印給之東京記曰

掌禁中宣索之物天禧中置傳宣合同司尋改今名御藥院

唐尚藥局有內藥院宋朝太宗至道三年又置御藥院於禁中也東京記曰掌合和御藥至道三年置在崇政殿後祥符八年徙外廊南寶元二年復移殿後東廊

內藏庫

宋朝會要曰太平興國三年十月宣置在銀臺門外

又曰景德四年十月陳彭年撰內藏庫記真宗曰太祖以來有景福內庫太宗改名內藏庫所貯金帛備軍國之用非自奉也呂夷簡三朝寶訓曰乾德初太祖顧左右曰軍興須豫備臨事厚斂非計也於講武殿側別為庫貯金帛此蓋置庫之始也沂國文正公筆錄曰太祖平諸僭偽收金帛歸京師貯別庫號封樁庫歲儲國用羨餘皆入焉諭近臣曰石晉割幽燕郡縣賂契丹一方人限外境朕甚憫之俟此庫所蓄

滿三百萬以為贖直會上仙事寢太宗改右藏庫
今曰內藏庫東京記曰國初置景福內庫太平興國
三年改曰內藏其說小異也

左藏庫

通典曰漢有中藏晉有左右藏晉江東置御史掌庫
曹後分庫曹曰外藏庫內左庫後省外左庫直曰左
庫唐有左藏庫百官志曰左藏晉始有之也東京記
曰國初止一庫興國二年分三庫曰錢幣金銀四帛

淳化三年分置左右右納左給凡六庫四年廢右分
左藏庫為四庫曰錢金銀曰絲綿曰生白匹帛曰雜
色匹帛祥符二年併金銀絲綿為一七年併生白雜
色為生熟匹帛

奉宸庫

宋朝會要曰舊五庫一宜聖殿二穆清殿三崇聖殿
四受納真珠五樂器康定元年九月合為一庫改名
奉宸庫也

御殿素厨

又曰大中祥符九年置在玉清昭應宮後徙御厨也
金水河

又曰東京水源曰祝龍泉過中年曰金水建隆二年
春命陳承昭引抵都城西架其水橫絕經汴入浚溝
乾德三年引貫皇城歷後苑內庭池沼皆至開寶九
年太祖親按引注王第及公主第也

五丈河

談苑曰京水自滎陽至于汴陳承昭本江南人習知水利國初上言導京水踰汴東北注河通山東之漕其廣五丈以號河其事在太祖時也

會府臺司部三十三

門下省

先秦有黃門郎而無寺府後漢嘉平六年始有之曰侍中寺晉志曰給事黃門侍郎與侍中俱管門下衆事故謂之門下省然則晉始名之也唐志曰晉始置

門下省也

中書省

中書之官雖起自漢武而所治之府魏晉始有之謂之中書省通典曰中書之官舊矣謂之中書省自魏晉始焉

鳳池

世謂中書曰鳳池者按晉荀勗為中書監遷尚書令勗久在中書失之甚恚有賀之者怒曰奪我鳳皇池

何賀故今以為鳳池

尚書省

通典曰堯試舜於大麓領錄天下事似其任也周之司會又其職焉鄭康成云司會若今尚書也漢有尚書臺宋始曰尚書省也

都省

漢以僕射總理六尚書謂之都省至唐垂拱中改尚書省曰都省是則都省之號始自漢也

南省

晉以門下名省號北省故以尚書為南省是則南省之稱始自晉也蘇鶚演義曰省省也謂省察天下簿書之所

御史臺

秦漢有御史府亦曰寺亦曰憲臺後漢始曰御史臺亦為蘭臺寺舊唐志則曰後漢改為憲臺魏晉宋曰蘭臺梁陳北朝曰御史臺也

臺門

御史臺記曰臺門北開取肅殺就陰之義韋述唐兩京記曰臺門北開以糾劾之司主意於殺故門北啓以象陰殺或曰俗傳開南門不利大夫譚賓錄曰或云隋初移都兵部尚書李圓通兼御史大夫欲向省便故開北門唐因循不改迄今遂為故事唐會要載裴冕語云此說若取冬殺之義本置臺司以糾正寃濫是有好生之德豈創冬殺之義以入人罪乎馮鑑

以冕說為當

柏臺

漢成帝時御史府列柏樹故人由是號柏臺

烏府

漢御史府植柏常有野烏數千棲宿其上晨去暮來
號朝夕烏一旦烏不至及朱博為大夫烏復至因號
烏府亦曰烏臺

九寺

漢以來九卿所治之府謂之九寺後魏始有二府九寺之稱然通其名不連官號其以官名寺自北齊始也蘇氏演義曰寺司也官有所司存釋名曰寺嗣也官曹相嗣續其中非也許慎曰寺從乂從寸寺者掌法度之所乂者乎象如手持尺寸以度其典章耳

秘書省

漢藝文志曰武帝建藏書之府置寫書之官天下文籍悉在天祿石渠圖廣內秘室之書故曰秘書後漢

有蘭臺東觀雖孝桓始置秘書監而不以其省至
梁始曰秘書省也唐六典曰秘書省中外三閣掌圖
書古今文字皆在禁中宋朝神宗改官制易崇文院
曰秘書省復唐制也

殿中省

魏置殿中監而北齊以屬門下隋大業三年分門下
太僕二局取殿內之名為殿內監唐為殿中省也

國子監

晉武帝咸寧四年初立國子學國子周舊制也北齊
為國子寺隋開皇十三年又為學煬帝即位改曰國
子監

少府

秦置少府而不治府漢始有之隋煬帝大業五年始
曰少府監也

將作

秦漢有將作而不列其府北齊始有將作寺隋文帝

開皇二年改寺為監

軍器

後周武帝置

都水

漢武元鼎二年始置水衡初秦有都水丞於是水衡
方有都水帝置都水謂之都水臺隋文仁壽元年始
改為監

太史局

少昊歷正曰鳳鳥氏夏曰太史隋以名謂曰太史曹
煬帝改曰監唐曰局乾元元年曰司天臺後復曰太
史宋朝以來亦曰司天臺神宗改官制復為太史局
也

太醫局

周有醫師秦置太醫歷代皆置宋朝神宗又置局曉
醫者一人判局事按唐亦有太醫署而神宗創置以
教生徒如學校也

入內省

宋朝會要曰國初有內中高品班院淳化五年改曰
入內班院又改入內黃門班院又改內侍省入內內
侍班院景德三年止名入內內侍省也又云景德三
年五月內侍省內侍班院請入內內侍班院止稱入
內內侍省本班亦請稱內侍省也東京記曰舊有入
內都知司內東門都知司至是悉併于此

內侍省

周官有巷伯寺人及內小臣之職戰國時趙有官者
令秦置中常侍漢有謁者內侍之官而不言其府北
齊始置中侍中省隋改曰內侍宋朝會要曰國初有
勾班院淳化五年改黃門院又改內侍省內侍班院
景德三年止曰內侍省

進奏院

唐大曆十二年勅諸道舊置上都留候院並官改曰
上都進奏院此蓋其始也宋朝會要曰唐藩鎮皆置

卽京師謂之上都留侯院大曆十二年改上都知進
奏院五代支郡聽自置卽國初緣舊制各置進奏院
太平興國八年十月詔於大內側近置都進奏官人
兼三四州也

檢院

國史纂要曰武后時投匭者或不陳事而有嘲謔之
言於是置使先閱其書奏然後投之匭院有司自此
始也宋朝會要曰唐匭雍熙元年改為檢太平興國

九年七月改匭院為登聞院至道五年或稱檢院景德四年五月詔改登聞檢院東京記曰唐置匭興國九年改匭為檢院曰登聞


鼓院

宋朝會要曰鼓院舊曰鼓司景德四年五月九日詔改為登聞鼓院

軍頭司

又曰國初但曰軍頭引見司後加御前忠佐之名又

曰端拱二年改軍頭司曰御前忠佐軍頭司引見司
曰御前忠佐引見司



事物紀原卷六